

憺

園

文

集

憺園文集卷第四

詩 虞浦集下

入晉 四首

十月朔風厲凌晨渡滹沱寒冰積驛路嚴霜悴喬
柯重裘增慄慄沽飲顏難酡客程屢迴互歲月忽
以過恒山旣塊莽抱犢亦逶迤我車復西邁感慨
揚清歌

淮陰昔戰處山勢鬱崔巍當年建旗鼓智勇何壯
哉成安泚水死左車戲下來破趙方會食一舉歟
奔雷我出井陘關古路多蒿萊寒鳥夕已斂浮雲

慘不開殘碑剩遺蹟駐馬爲徘徊

亂山赴西極蜿蜒不可窮高嶂摩層霄并門一線
通涼秋下霜霰昏旦蔽曈曨瀑流祇辨響色與凝
雪同戰壘吹邊聲牙旗卷朔風飛鳥尚難越丸泥
詎能封重關護燕趙天險何其雄

疲驛近壽陽皚皚積深雪飛泉瀉虹梁亂石妨車
轍古道矗頽垣人家盡陶穴荒祠藏鸛雀枯樹鳴
鷓鴣寒風淅瀝吹手足俱皸裂邨酒不醉人憂來
自紆結

題梅花書屋爲王襄璞方伯

雕甍列華軒綺窓明砥室素壁畫江山綈几盈湘
帙長筵衍清宵密坐娛永日寒冬邁春陽發生在
吹律梅花蚤繽紛皎皎冰雪質迢遙羅浮夢綽約
瑤臺匹將爲廣平賦媿乏雕龍筆側想胥江頭踈
花照簷白驛使何時來臨風增太息

審交詩

海內悠悠者冠蓋紛皇都平生期管鮑一旦成蕭
朱傾蓋相綢繆中道不克俱嗟我同心友秉志執
區區莫羨桃李榮彫瘁在須臾莫爲斥鷃笑決起
搶枋榆南山有松柏青枝自扶疎鸞鳳相和鳴聲

與凡鳥殊願言宗令德金石誰能渝

醉歌行酬襄璞方伯

晉陽城邊吹暮笳故宮衰樹啼寒鴉有客飄零自
吳會高歌擊筑天一涯臨沂王公夙好士官閣開
筵生綺霞名賢能致李元禮上客還來鄧仲華小
史彈箏十五六可憐顏色穠如花堂前錯雜盈珠
鳥妙舞霓裳樂今夕中宵洗盞向曲亭擊鉢投壺
事非一寒雞再唱殘月沈主人投轄還畱客髡心
最歡飲一石東方欲曙渴烏赤騎馬歸來踏霜色

送別鄧偶樵

高吟短筑共天涯鳴犢祠邊別仲華匹馬濃霜上
黨滑千峰晚照太行斜風傳笳鼓行持節偶樵候補按察副使
月隱帆檣更憶家暫對故人桑落酒他時驛路有
梅花

寒宵行酬金冶公

金公當代稱人豪寒宵開讌招吾曹雕盤千里致
鯖鱠美酒十斛傾蒲萄當筵忽奏關山曲攢瑜錦
帳燒紅燭銀魚學士醉更狂強學吹簫舞鸚鵡吳
兒體弱酒乍醒猶抱筵前雙玉瓶欲歸未歸久佇
立露華清冷流寒星金公豪興真無敵手把觥船

頻勸客憶自論交吳市門三年兩遇長安陌千騎
旋看旄節行萬山復歎鱗鴻隔銅魚峰高銅鼓鳴
錦官花開錦江碧七年無日不相思却到并州數
疇昔少弟浮沈苦腹饑狂生瓠落蒙頭責故人相
見且開顏戴笠乘車言不易昨日遺我錦襜褕今
朝贈我青驪駒三關落照難分手意氣如君天下
無

贈友

十載江湖穩釣磯跨鞍絕塞欲何依草荒白帝家
難問瓜熟青門事更非述作千秋身未老悲歌萬

里客將歸并州風勁霜如雪送爾離亭淚滿衣

飲王方伯署中次趙秋水韻

歲暮并州客鄉心寒雁催好尋逸少語復爲景真
來臘酒今朝熟梅花昨夜開淹畱須盡醉落日敢
言回

與歌者胡生兼示龔公子伯通

四首

急管繁絃白玉堂燈前巧作可憐妝生來南國桃
花面却住并州近十霜

鴛鴦新製合歡襦公子風流絕代無昨日玉釵輕
棄擲

伯通雲中遇一嚴人許至
晉陽往迎得胡生遂與絕

已教密約負當壚

阿侯催喚已斜曛
結束還憐惱使君
病起佳人添意態
懶將新曲遏行雲

詞客當筵擊鉢時
凝眸隔座酒行遲
不知多少纏頭贈
抵得徐郎四首詩

將之河東不得因寄董侍郎

晨發叔虞祠遙指首陽岑
駕車逝行邁願言思所
欽流年彫旅鬢條風吹客襟
終然戀故鄉改塗嵩嶽陰
面轡伯樂坂四牡方駸駸
龍魚赴淵澤晨風棲北林
瞻望不可見飛鴻將遠音
庶幾惠方訊珍重踰南金

發太原途中述懷寄襄璞五十韻

客有窮愁者驅車過晉陽山河臨趙代風俗記陶
唐秋草連天白寒雲帶郭黃翦桐封域古避暑故
宮涼清嘯劉琨壘悲風孤突鄉并州霜萬戶汾水
雁千行但貫當壚酒誰分透壁光高吟還躑躅短
鋏復徬徨意氣逢王濟聲名邁鄭莊長松聲謾謾
清鏡水汪汪右輔資彈壓西陲詠樂康衙齋閒下
榻官閣靜焚香列坐盈厨顧當筵奏羽商分題催
五夜行酒約三章明月侵綈几梅花落筆牀侵階
栽芍藥滿壁畫瀟湘倚樹同棲壑臨流似泛航張

燈綺席換進饌玉盤將茗豈王濛
厄鯖嗤樓護嘗江鄉來橘柚海國致魴鱠
刻蠟恒投轄聞雞尚挽裳高談飛玉屑
妙理闡珠囊射覆奇能中投壺巧莫當
圍碁推謝傅書體辨袁昂黃絹摩碑刻
青萍拂劒鏐醉容阮籍傲笑恕陸雲狂
題鳳過蕭寺停驂問草堂淹畱逢歲臘
荏苒紀春王綵勝紫鄉夢椒花酌旅觴
雲飛違定省草長憶池塘筆策聽終苦
驪駒去欲忙贈言呵凍瓦揮涕濕行裝
雙壁同薇署聯吟隔苑牆旄麾臨祖帳
賓從上河梁才絕龍沙客名高騎省郎
千秋期共勗兩地意難忘落

日洞渦暮浮雲句注蒼銅鞮存舊邑赤狄本巖疆
廢驛尤如豹空山石似羊春寒行上黨冰滑渡清
漳石室迷仙徑長平弔戰場豐碑傳孔氏遺廟肅
炎皇歇馬太行麓烹魚漢澤旁美人貽錦繡都尉
賦駕鵞蜚蟹看投分參辰倏異方志同櫪驥伏時
比蟄龍藏性癖嵇中散知希虞仲翔吹噓生羽翮
翦拂待騰驤橫笛思千里披襟攬八荒碧霞橫海
嶠歸路指微茫

送犀公入廬山西林

遠公朝別我獨自向西林去路白雲合到時芳艸

深浮杯星子岸洗鉢虎谿陰異日陶居士聞鐘何處尋

荅越辰六見贈作

二首

之子東南秀才名動碧雞折梅經嶺外走馬到天
西來憩窪樽石行過罨畫溪羊車看洗馬樂廣譽
真齊

辰六是湖州太守蘭次壻

犧榜經邗水驅車入帝城幾年知姓氏今日慰平
生堂是碧瀾舊樓仍韻海名從君此吟嘯不淺折
麻情

贈吳蘭次

四首

十年羽獵薦雄文畫省風流獨數君按部旌麾千
騎出行春詩句五湖聞香消夢憶青綾被興到書
題白練裙最是政閒豪興在禊堂賓從日如雲
隋隄碧柳曲江花才子揮毫賦落霞夜坐石牀題
險韻朝逢竹馬擁行車春來醅發烏程酒雨過香
生顧渚茶莫憶竹西歌吹好前溪妙舞盡吳娃
官舍焚香簿領閒清風高韻是神仙右軍載酒羅
車騎小杜題詩雜管絃笠澤水光晴鏡裏弁山樹
色晚霞邊江湖長可輕官職五馬如乘范蠡船
官梅東閣復何如有客飄零歎曳裾勝蹟聊尋李

左相斷碑還問沈尚書正逢花信三春半欲話交情廿載初慚媿風塵猶短褐可能相憶下熊車

禊日愛山臺分韻

繇花三月徧菰城太守筵開禊閣晴湖上翠微懸塔影雨餘碧樹待鶯聲試談往事聽前輩爲愛佳辰集友生送客畱髡重翦燭厭厭河漢欲三更

贈陳子壽

不見陳遵近十年相思擬泛尚湖船豈知作客菰

城道却得相逢禊閣前感舊驢鳴孫楚逝

子壽與扶桑友善方

爲作傳

銜哀免擾蔡邕賢

子壽方葬親

他鄉寒食多風雨握

手高吟一愴然

贈吳石葉

二首

初日芙蕖豔才華迥不同吟詩官閣裏聽瑟画樓
中賦就驚宗袞

梅邨先生
極賞石葉

篇成播國風荷衣今羨汝

媿我已成翁

王謝吳興守由來父子傳人看居末座事定逼前
賢珠玉神偏王驊騮步欲先他時重接武不數永
和年

逸少安石皆父
子爲吳興守

贈茆再馨

暨陽分手日忽復一年餘作客書難達經秋夢亦

疎譚經絳帳，笛鼓鉞碧川。魚緣几湖山，在相看逸興舒。

走筆招園次

三首

辛夷花謝海棠開，碧幌和風燕子回。貫得箬溪新釀酒，待君騶騎草堂來。

君家祭酒最風流，侍御聲名動歙州。

吳侍御方漣

平子更

攜清玉案

張菊人

會須同泛白蘋洲。

碧瀾堂畔每趨陪，义手詩成絕代材。喜有羊何酬好句，莫因簿領廢銜杯。

峴山示園次

三首

亭畔窪樽在人知杯飲風冥搜元李相欣賞復吳
公城郭蒼茫外溪山杳藹中未妨酩酊醉歸騎與

君同

窪樽亭

塔勢侵斜漢湖光抱遠峰使君誇盛事逸老問高
蹤雨過泉聲滑春殘樹色濃當時猿鶴侶折簡到

吳淞

逸老堂 正德間逸老
會崑山人張橐與焉

此地稱賢牧千秋有數公丹青祠廟在姓氏簡編
中寂寂臨春澗寥寥逼梵宮傳芭勞里賽側想古
人風

九賢祠

湖州送張菊人

四首

碧浪湖邊桑葉齊，夾山漾口早鶯啼。
相逢莫漫愁離別，箬酒新香醉似泥。

片帆隨雁下衡陽，楚客歸裁荷芰裳。
四壁閒看宗炳畫，可能無夢憶瀟湘。

難忘崇臺被襖時，蒲帆十幅去應遲。
吳興太守清狂甚，送客高吟白紵詞。

句曲千林護翠微，仙壇白鶴入雲飛。
羨君紫氎翩然去，獨向華陽洞口歸。

贈趙秋水

四首

鳴犢祠邊別爾歸，雷塘重見涕沾衣。
可憐楊白花

如雪却逐東風處處飛

叢臺古道雜車輪獨立人看趙景真
少小曾交燕趙客此髯超逸世無倫

官閣屠蘇設宴時分題刻燭夜吟詩
煩君寄語王懷祖愛客風流更阿誰

洛州處士在牆東小弟承恩騎省中
申鳧盟隨叔若問婁

江近消息穆穆短髮已成翁

吳江旅舍示弘人孝威

伏閉江城客支離洛下吟慣辭熱客
去不厭故人尋病爲酒杯劇愁兼暑
喝侵此中饒野興几簞接

松陰

贈弘人

相逢多難後憐爾二毛生
憶弟風霜劇思親涕淚橫
延陵喪子痛奉倩悼亡情
莫以窮愁累須傳千載名

贈李蠖菴

二首

此地清風在如君廉者稀
去官還自喜作客竟難歸
饑只看塵甑寒惟綻故衣
翛然同野鶴談笑每忘機

意氣凌霄漢中情豈暫忘
山椒頻蠟屐夜館或飛

觴落筆多道勁論交愛老蒼濁醪應已熟無復問
行藏

清明日吳伯成明府招飲

感君無限意密坐向深更酒碧濃于柿歌清細抵
鶯新詩吟夜館纖月落春城客散驚烏起瀟瀟涼
笛聲

秦對巖齋中小集限韻口占

使君乘興至幽徑俗塵無共結江臯佩誰探象罔
珠東南稱地主詩酒笑狂夫雨後花欄靜春風入
畫圖

別伯成

三首

莫嫌屈百里尺木佇雲霄

尺木堂名伯成先擢大行今秋當代去

借寇車還

駐思家旌獨搖秋風京口渡寒月廣陵潮旦晚飛騰去千人折柳條

治行誰能並風流亦可師放衙還命酒判牘雅裁詩狂作張芝艸閒消謝傅碁龍山雲起處松鬣最離披

相見無苛禮深懷在不言泛舟尋野寺看竹過名園月向吟時白花隨醉處繁平生知己恨詎復似

虞翻

伯成坐中即事口占

二首

佳人慵倚合歡牀，繡佛閒身已十霜。
向客陳辭最慷慨，如何天壤有王郎。

燕子銜泥出畫堂，使君深惜舊雕梁。
不嫌椎髻無閒住，此地從來說孟光。

送王石谷之秣陵謁周櫟園使君

四首

虞仲祠前三徑紆，聞君蹤跡慣江湖。
相逢第二泉邊路，萬樹秋晴入畫圖。

石谷摹宣和江諸秋晴卷甚精

祇今粉繪許誰工，老輩淒江二妙同。
聞道比來都閣筆，說君真過石田翁。

王奉常謂石谷畫品在沈石田上

獨立翛然意氣真
右丞高潔是前身
藍田輞水平
生意莫向王門奏
鬱輪

六幅蒲帆兩岬楓
未妨載筆問宗工
使君傑閣連
雲起建業千山在
眼中

口號示伯成

六首

微霜初下曉風寒
千里關河欲跨鞍
橘柚乍黃楓
漸赤正逢好景別
君難

金縷銀船醉共吟
清宵燭跋漏沈沈
由來天監年
時水別恨平添一
丈深

畫舫遲遲愜勝遊
東南文士此淹留
清狂近有焚

魚客好句先題雲起樓

時葉初蒼
將至梁谿

衡齋風雨亦相招賭墅圍棋逸興饒頭責休嫌秦

子羽故人舉手待雲霄

謂秦
畱仙

君家騎省好聲名

耕方

桑葉尊前百感生精衛朝朝

銜木石幾時滄海放春耕

扶風門下有康成憔悴當筵濯短纓醉裏忽思廿

載事翩翩輕俠是劉生

震脩

佳人篇贈盛珍示

佳人深閨裏初日照豔姿炙簧更調瑟敏妙工言
詞逾時乃得嫁猶然守空幃手持盤龍鏡常恐朱

顏衰黽勉事機杼婦職固當爲平旦理黃札札
烏啼時織成錦繡段五色紛葳蕤一匹直十鎰見
者爭歎咨婉孌真絕世辛苦良不辭翩然東鄰女
花間曳履綦倚門雖云好未若刺繡宜

李陽驛

地是池陽舊程還姑孰西背江僧寺出傷岼戍樓
齊水落潛蛟徙風高班馬嘶人烟皖國近樹色宛
陵迷春入輕萋長山橫斷靄低颿檣集估客市井
宅遺黎隔歲荒禾稼頻年畏鼓鼙沙平晨放犢邨
遠午聞雞孤嶼漁人宿空梁燕子棲我來多感慨

驛壁醉重題

李陽驛迴瀾閣次丘季貞壁間韻

二首

江流對皖口短棹此經過
覓酒荒邨少題詩古驛
多高樓巢燕雀落日走
鼃鼃匹練愁還遠當窓發
浩歌

父老言驕將當年鐵騎過
羽書樊口盛戰壘石頭
多岍草飛青燐江潮舞白
鼉臨風憑遠眺感動一
悲歌

三疊季貞韻

丘遲入荆楚錦纜此曾過
黃綃辭真妙青衫淚已

多佛燈寒竄鼠戍鼓夜鳴鼃子亦飄零者還來倚檻歌

石亭寺釣天閣

寺係唐觀察使韋丹祠丹封武陽郡公

落日洪州外雕甍百尺樓丹青賢牧往祠廟武陽
留亭借松門石花深佛殿秋銘辭張載重篆筆李
邕道閣並滕王迴窻臨章水流舟車千里集烟火
萬家收明月桓伊笛清尊絳樹謳爐香青泛泛草
露白浮浮韉鞞江聲壯琤琮木葉愁釣天真聽樂
應勝夢時遊

滕王閣

帝子畱高閣，嗟我壯豫章。江連吳楚闊，山指越閩蒼。
畫棟臨馳道，雕甍帶女牆。賢侯開廣讌，才子獨專場。
勝事傳來舊，風流孰可方。山川遼鶴異，歲月劫灰長。
故壘飛青燐，殘碑卧白楊。俄來庾開府，重見魯靈光。
工似胡寬巧，書還韋誕長。璇題懸曲檻，繡戶繞迴廊。
壯麗欺黃鶴，孤高想岳陽。笙歌人駐馬，冠蓋客傳觴。
南浦輕綃卷，西山繡幄張。縱橫羅井邑，來往送帆樯。
雲近當軒濕，風微入牖涼。招尋閒躡屐，感慨乍沾裳。
搖落經窮海，飄零睇故鄉。憑高攀古蹟，酌酒弔王郎。
祇願風帆轉，飛騰過馬當。

贈汪徵五

清霜被江甸，離離楓樹林。
有客過鄂渚，倚櫂多悲吟。
疇昔崔李輩，風槩心所欽。
美人旣已往，瞻眺空嘔歎。
夫子客沔口，託寄感慨深。
涖官早落拓，覽勝遂滯淫。
濯纓就滄浪，抱甕息漢陰。
庶幾昔賢躅，慰予饑渴心。

黎媿曾九日招飲賦贈

使君旌旆駐江濱，佳節招尋會故人。
雁帛不逢虛憶弟，萸囊欲佩轉思親。
共傾三雅成詩捷，莫厭雙鳬折簡頻。
黃菊青楓淹歲月，龍山北望倍傷神。

愚山招飲李維饒園和韻

群公車蓋會平泉漫遣羈人赴玳筵鴻雁叫霜天
半冷芙蓉著雨鏡中妍美人佳句琅玕贈公子遙
情杜若牽明日芒屨廬嶽去思君多在水簾邊

聞元仗學使校士德安安陸襄陽輒有此

寄

三首

雙旌行部正威遲勝蹟江山覽眺宜擊汰帆過雲
夢澤鳴騶路指鷗鷺陂霞明似幔花開處月白如
霜雁到時却罷清尊啜清茗諸生環侍絳紗帷
名邦雲杜漢時稱此日龍門羨李膺明月珮憐交

甫去清風臺憶楚王登百年王氣消興邸七澤詞
人誤竟陵定有梗楠材可採工師加手便從繩
襄南形勝近淮西十載時平息鼓鼙酒熟宜城香
灩灩碑荒峴首草淒淒卧龍岡上廬猶在騎馬池
頭路不迷爲說陽春方見賞兒童休唱白銅鞮

至武昌值元仗往湖南

寂寥橫江館突兀黃鶴樓江風颭飛浪日夕搖孤
舟所親在沔漢庶以申綢繆詎圖木蘭柹迺涉瀟
湘流瀟湘千餘里旌旆何悠悠月明青草岼雁叫
黃陵秋張樂軒轅聽蕩瑟靈妃遊吾欲往從之道

路阻且脩蕭蕭鬢髮變冉冉芳歲適安得酈醪酒
一飲銷百憂

武昌值丘近夫將歸作四絕句送之

使君飛蓋洞庭濱鼓吹喧闐堯女祠官舍蓬蒿門
自鎖高吟抱膝有丘遲

鴻鴈江天相背飛我來鄂渚子方歸扁舟東下風
偏利欲寄家書淚滿衣

苦竹青青楓葉丹楚山楚水帶愁看莫因地煖忘
添絮路過湓城便苦寒

老親健飯杖鄉年覓伴時須沽酒錢長跼開囊奉

匹綃羨君真不異神仙

楚中詠懷古蹟

十二首

廣燕亭

鄂王有故城江東建赤縣樊山在其陽落日照春
殿北退皖口兵西罷猗亭戰釣臺高嵯峨君臣極
歡讌雖非混一時雄畧千古見吾誦謝眺詩揚舲
去還戀荒亭倚大江奔流疾如箭霜楓下吳宮夜
猿吟楚甸霸圖久銷沈殘霞尚餘綃

陶公宅

典午喪亂餘大厦將傾倒赫赫陶長沙江東資再

造羽葆巴丘來居中便征討南陵至白帝威行萬
里道榮寵極人臣勲名兼壽考天門翼雖折祠廟
圖丹青石樽出廢宅柳色明郊坰斯人雖已泯衍
佛思精靈

南樓

南樓月上時元規甚瀟灑長嘯據胡牀縱橫命觴
斚是時方清宴江介無戎馬物望殷深源清言褚
季野賓佐堪畱連山川足吟寫千古庾征西流傳
入風雅一朝召寇至宮省如亂蓬膝屈陶太尉心
慚鍾侍中狼狽尚征鎮茂弘愁西風雖荷棟梁任

曾無分寸功猶餘清興發差與名士同

黃鶴樓

江漢日夕流危磯立黃鵠當時騎鶴人餐霞色如玉
空山一朝翔千載傳芳躅飛樓高入雲泱莽興遙矚
東津指吳會西驛連巴蜀鱗鱗駐征帆翩翩集華轂
彼美發高吟哲匠不能續撫景空徘徊揮翰復局蹙
至今綺井間寥寥郢中曲

赤壁

雒京亡劍壘中原豺虎爭曹氏吞秦劉指顧六合
并鼓行下襄峴電發趨蠻荆豫州甫顛躋江表亦

震驚刻日治軍獵衆議銜壁迎英雄裂皆怒斫案
攘袂行先聲仗公瑾妙算契孔明艤艫一炬燼煙
燄飛縱橫一奏烏林捷三分勢乃成我行赤壁下
古戍寒鴉鳴英雄今則無懷哉阮步兵

岳陽樓

岷江下巴陵南連洞庭水城郭臨蒼茫萬象窮指
視飛甍雉堞間賢牧曾經始江山有靈境屹然壯
千里融風忽以扇蔓草存遺址停艫一騁望水勢
空瀾瀾淦陽下微霜木落彫芳芷帆隨飛鴈沒月
向夕波起羈客逢暮節萬感寸心裏況茲懷古情

慨歎靡窮已

軒轅臺

軒轅駕六轡南紀窮熊湘張樂洞庭野旌旗凌八
荒鑄鼎荆山下騎龍升帝鄉小臣攀髯墮仰視涕
浪浪傳聞昇仙處極目空青蒼墳典旣闕略方士
多荒唐徒令茂陵客濡足還褰裳

黃陵廟

重華狩蒼梧二妃止江汜翠輦不復回南楚悲風
起腸斷九疑峰淚迸瀟湘水環珮辭人間古廟蒼
烟裏湛湛芳桂醑尚醑帝子靈鼓瑟馮夷舞啼猿

山鬼聽秦皇赭伐後竹樹常蔥青

汨羅江

靈均既放逐憔悴浮湘沅悲憤作離騷託寓多煩
冤取舍龜策卜醒醉漁父言身沈汨羅水國事誰
與論汨羅波浩浩日夕荆郢奔嗟哉蘭臺客四遠
招爾魂靈氣感風雨慄慄愁乾坤天意令窮厄千
秋風雅存

賈誼故居

年少洛陽生絳灌皆側目遭遇漢文帝上書猶痛
哭故居五畝宅傳在湘川陰所思不可見一望惟

三百五十三
楓林

鄴侯宅

南嶽迴嶙峋樓觀紛迤邐中有鄴侯居空岫白雲
起蹲鴟食半殘松花落未已俯仰但陳迹蒼翠藏
深廬緬思玉軸富插架三萬餘宰相與神仙何能
廢讀書

孔明廟

雙流蒸湘水獨秀石鼓山直北拱衡嶽四向紛烟
鬟武侯駐車處遺廟蒼厓間草猶青綸色花似朱
旗殷日暝山氣落流水聽潺潺吾聞渡瀘後爲討

西南巒此地一來往千古還追攀

衡陽贈余西崖

片帆隨鴈到衡陽氣誼君還似鄭莊曲隰雨深埋
薜荔小池春靜繞簷簷看換字籠階下鶴爲畱
賓舞榻旁苦畏折腰辭五斗便隨漁艇泛瀟湘

寄宋牧仲時爲黃州別駕

黃州雄郡淮楚交昔日邾城蕞爾地甘寧得檄不
屑行陶侃臨江議欲棄習戰空聞黃祖軍分兵竟
誤征西計蘄春北渡人煙稀隔岸樊山見旗幟一
自車書混一年永安重鎮朱旛至木陵關口近仙

家綠楊隄畔多遊騎竹樓青絕雪堂間人物風流
自茲異梁園才人相家子出入明光執戟侍翱翔
合在鳳凰池佐郡一麾寧稱意天令江介識王祥
碧油車憶青絲轡雅頌應教變楚聲廉平自足風
群吏昨子來食武昌魚君方謁帝承明廬錄別酒
樓餘十載石頭屢誤洪喬書一鶴西飛掠江面臨
臯清夢今何如

詠雁寄舍弟

霜天一去遠龍堆暗逐流年羽翻摧太華偶看仙
掌度上林還帶帛書來橫斜彭蠡秋風冷嘹唳湘

江夜雨哀縱復稻梁堪繫戀路過衡嶽倦應回

贈某上人

二首

不道彌天釋閒園借一龕名流嘗避席老宿許同
參氣結青牛紉光騰白馬函那知吟嘯地浩劫見
優曇

趺坐繩牀穩無須縛草屨看山真不厭小住亦爲
佳梧竹閒侵目蛟龍夢入懷嗟予京洛去難忘是
蕭齋

懷舅氏

自別維亭二載餘風塵驅走近何如伯鸞慷慨思

浮海正則羈愁未卜居亂後相逢憐舊雨客中多
累是殘書何時歸守先人墓出入遨遊下澤車

同吳玉隨觀妓劇飲山園和玉隨韻

春深楊柳動晴絲急管繁絃促賦詩鄴下獨推吳
季重樓頭誰比杜紅兒雲生遠岫迷遊屐日落飛
花到酒卮倒著接離郊外去吹簫擊筑任吾之

荅方爾止

高名海內重方干紫氎風流老輩看酒後談諧宵
更劇客中圖史晝常攤韻探王沈千秋祕篆擬冰
斯六體完何處尋君頻問字清淮水碧釣磯寒

送家兄孚若北上

驪馬花開春色闌，送兄匹馬向長安。
一尊酒盡傷離別，萬里風高刷羽翰。
盛事橋門方駐蹕，名流碣館獨登壇。
洛中仍有東西舍，驪唱何須說路難。

贈亳州諸故人用顏餐園六年前酬唱元韻
譙國高臺繫馬處，重來風景復何如。
竹林曾款嵇公鍛，韭几猶存逸少書。
白練望鄉千里外，青尊惜別六年餘。
長卿犢鼻今還在，鏡裏朱顏不似初。

再贈餐園

匹馬梁園辭爾去，紆衣款款定交初。
常思雨雪王

猷棹每怪浮沈殷羨書芍藥花開三已後蒲萄酒
泛五更餘羨君白髮才猶健擊鉢詩成媿不如

錦雞

雙鳥比翼翔來至六夢國朝日振羽毛陸離耀五
色主人嘉靈表彫籠置戶側香稻玉盤寒俯仰安
啄食薄軀荷殊恩庶幾自脩飾

餐園招飲次韻

陳王千載去無復建安初草長嵇公竈碑荒梁鶴
書金籤委地久玉軸作塵餘羨爾縹緗富百城擁
自如

題涿州店壁

行過樓桑路悲歌獨苦辛
幾番題壁客十載上書人
馬鐸終宵漏牛車盡日塵
不逢荀濟北那識是勞薪

憺園文集卷第四

愴園文集卷第五

詩

詞館集上

及第紀恩示同年蔡石公孫岷瞻

席帽頻年挾策遊叨蒙一第主恩優同時名姓
稱龍尾幾部笙簫簇馬頭懸綵御街金榜出開筵
大府玉觴畱送歸鹵簿寒儒邸九陌人爭看擁騶
春讌書事

名園開讌賞折簡荷招攜花霧濃雞舌苔痕澀馬
蹄地爭野老席山接相公隄淺藻看魚戲踈篁待
鳳棲削峰侵碧落疊石架丹梯蝶欲穿蓂宿鶯偏

駐柳啼弓聲乾霹靂橋影濕虹霓桐汗霞蒸潤松
濤月暈低歌鬟鬆玉櫛舞袖拂金鏡綽約疑蓬島
風流勝會稽坐來天遠近見處水東西綵筆凌鸚
鵡韞刀瑩鶚鵠時珍嘗比目土物擘團臍韻牒催
詩急觴條勒飲齊號呶交履舄鄭重出繒綈莫惜
春將晚何妨醉似泥

喜汪蛟門至和沈康臣韻

二首

目斷維揚信新秋好促裝有詩題野館無策壯奚
囊埽榻涼初至挑燈醉不妨故人同失喜歎歎對
壺觴

別後登臨興應知屐屢穿且傾燕市酒須著祖
鞭征雁隨人至秋花刺眼然紅塵十丈起好爲解
金羈

上王敬齋宗伯

丹陛推耆舊烏衣絕等倫一經延盛德萬世繼先
民報主文章在興王禮樂陳全家依日月獨步上
星辰論已推公望朝方藉國楨趨庭金騶裏接武
玉璘珣世典蘭臺重門栽槐樹新同時鏘劍佩並
室畫麒麟自可傳弓冶何須遜渭莘蘇公原有子
李泌漫尋真赤烏歸元老青山領大臣閒披白鶴

肇時側紫綸巾鑿沼依靈囿澆疏引御津五千箋
道德六一籍周秦洛下開名社香臺洛隱淪神僊
兼翰墨泉石寓經綸詩句留傳遍雲煙過眼親菊
枝黃似錦蟾影碧如銀書帶沿堦草花香接砌茵
銅盤催進酒絳燭幾留賓聖代存喬木瀛寰頌大
椿陽和回律琯洞壑盡生春

送閻華亭

送別津亭晚秋槐落滿茵應知三泖上已有欲絲
尊過壠禾承幘開衙鶴近人扁舟吾亦往百里坐
陽春

送清豐令

赤縣連畿輔蒼生倚上才
剽錐猶出俗煦育自嬰孩
粉堞河依岸琴堂艸沒堦
休卑千室吏初向日邊來

送金君之任雲南

憐君東閣舊選牧自才賢
六詔分符出雙童夾轂前
山峰疑太乙水氣是溫泉
別路晨裝外猿聲墮碧煙

送宗鶴問之吳興

十年詞賦重三都託興煙霞五嶽圖
曾共張華遊

上洛還因柳惲過西吳同心幸結江皋佩好句頻
探罔象珠況有吳山看不厭烏程是處酒家壚

送宋荔裳觀察兩川

劍閣青山外盤叢驛路西行旌紫氣飛蓋指青
霓健翮凌鷹隼霜華淬鸛鷀山公曾薦達宋玉解
招攜秦隴烟雲隔江潮草樹迷書因探禹穴花爲
種蘇堤案部常隨雨占星屢聚奎儒臣看挺拔公
望養端倪遂有脩蛾怨還驚暮鳩啼賢人愁市虎
謗語及文犀蠟屐畱吳苑清尊滯越溪蒼生看擁
節賓從復歌驪叱馭新逢蜀觀風舊屬齊荒城山

狖響棧路棘人棲叩笱真能諭峨眉竟可梯新
傳織罽雅化遍耕犁今已標銅斗神應祀碧雞後
時聞報政高步向金閨

座主柏鄉相公齋中小坐

高平相業重西京鉅鹿風標繼盛名正色朝端知
濶度蠲租海內頌昇平千秋著作垂金鑑萬國平
章倚玉衡會得微言濂洛意居然黃閣一書生

上座主合肥先生

嶽靈鍾大蜀斗瑞降長庚人以名山重天原間氣
生無雙推國士二十領專城楚豫稔氛盛江黃草

木驚潢池羣金沸渤海獨春耕鳳紙徵書急螭均
召對榮龍鱗曾獨犯虎尾敢相櫻髮繫千鈞重身
扶廣厦傾運移終漢祚帝眷借周楨積霧難終
隱高岡待一鳴行藏關否泰出處爲蒼黔借箸勤
謀略陳書策治平達時寧慙直報國有精誠絳灌
才還忌弘湯意獨輕窮簷遙待澤中禁蚤揚聲溫
語稱才子閒曹領大晟於菟三已仕縫掖半逢迎
石鼓無氎坐枕柳奉詔行圖還尋夢卜賦自獻河
清文景開星象君宗屬舊盟有功心豈弟公叔望
崢嶸夏屋烏爰止洪波魚不賴雞鳴朝放赦鈴靜

夜談兵密奏災祥息昌言氣象宏回天雙赤手砥
柱一孤莖常伯峨冠珮和風協磬笙惟金堪作鑑
有玉藉持衡冀野搜羣駿滄溟跋大鯨瞻雲同御
李立雪早依程馬廩傳經秘龍門躡履盈論詩呼
卜氏讀易進公明溟海誰能測華鐘日待鏗珊瑚
裝孝穆楊柳賦蘭成東璧元書府南樓但酒鐙斯
文真有主我道喜長亨近得神仙侶還尋大藥烹
五千粒史與三百絳衣羸祇恐黃麻至難將綠野
營六轡連極動八柱入雲擎司馬宜專相蕭何不
贊名訐謨身未老逸嘯興還并秋水長投釣春楓

坐聽鶯初陽廻弱線介酌注深觥綵袖麒麟秀孫
枝棣萼萌椒花持獻頌柏子駐調羹一奏巴渝曲
誰將雅調賡

召文假歸次宗伯王先生韻送之

四首

頻爲京雒客漸覺故人稀君到無多日那堪又送
歸出門霜氣迴極目練光微一奏驪駒曲紛紛木
葉飛

看君如野鶴流響入層雲著作千秋得聲名薄海
聞閒居潘令賦釋勸士安文獨向滄州去行藏
不羣

爲郎十餘載四壁總蕭然
婚嫁都無累漁樵別有天
流觴三已褰卷幔五湖船
應訪靈威老探書林屋偏

驅馬頻寒暑風塵強舉杯
不言征路苦好及早春回
匹馬蘆溝雪孤亭鄧尉梅
儻逢飛鳥便頻寄尺書來

康熙九年十二月十九日

上召對

弘德殿學士

臣

哈占引

臣

啓傳

臣

在豐

臣乾學

臣

牛鈕

臣

博濟

臣

德格勒

臣

沈

獨立以次奏事畢

命

臣

啓傳

臣

在豐

臣 乾學進 殿內分立 御座旁

上曰今日無事汝三人可各賦一詩滿庶吉士講
書可也中涓傳 旨賜坐詩成並蒙
睿獎 賜茶而出

承恩趨建禮待曉入明光萬戶聽寒漏千官踏早
霜宮雲回雪霽禁樹帶春陽鵲立聞 天語鵷聯
拂 御香恤民同舜禹論道溯炎黃何幸 宸顏
近方忤化日長牙籤標甲乙玉軸富縑緗講學超
崇政題詩邁柏梁蓬池慚始進騎省媿爲郎願得
探柔翰長依 黼座旁

送黔撫

海岱文章伯蓬瀛侍從臣謨謀資啟沃敷歷著經
綸典禮容臺肅詳刑棘寺仁公才持藻鑑群品荷陶
甄 帝眷班行最臣勞出入均九霄頒玉節萬里
動熊輪險阨南邊重聲馳嶺表新盤江通楚蜀黔
塞控滇閩節制雄諸鎮懷柔格九濱霜威消瘴氣
冕服佩文身銅柱功誰敵龍標句若神即看回節
鉞佇待履星辰擣散初通籍門牆忝望塵乍忻依
鳳采俄見運鵬鱗鑠才真老驪駒戀倍親青門
開祖帳紅樹俯華茵衰草天南路垂楊笛裏春持

將報明主早晚候平津

次陳子萬卜居韻

公子經年此儻居烏衣門巷已成虛飄零何異遼
東榻蹉跎還看下澤車春發小齋花掩冉風迴幽
徑竹蕭疎殘書賸有千餘卷好借鄰燈照屋廬

座主相國魏公五十壽

元老尊黃閣中台翊紫宸禎符樞運斗泰道日重
輪主聖資爲楫王言吐若綸卜年扶孔固必
世合歸仁軒曆垂衣日虞階舞羽旬封章利病咎
損益質文因坐論從容對游歌泮渙陳由來聞弼

亮尚憶策天人吾道尊先覺群言擇大醇臨軒還
特簡開館即初甄封駁黃門夕敷揚紫禁晨彈
文依綠仗諫草展華茵股栗群僚憚容肥四海春
繁香羅蕙蒞勁節老松筠卿月升皇路台階領
要津柏梁躋獨座楓陛秉洪鈞亞相中書並天
卿上宰掄十科憑弊吏九品辨官人玉燭調俱正
金甌卜更新總師仍立相一德實成鄰赤烏徐聽
履丹裳儼奉紳陰陽和併變天地贊維寅材藝膚
偏遜平章政已均士猶三吐接書讀百篇頻大禮
真須制茲文幸未湮皇初探簡策正始闢荆榛詩

擅幽風美書窮楚相真切磋歌綠竹考驗識丹蘋
如貫俱歸約多能是席珍賦應卑屈宋學已洞關
閩黃髮他時豫丹書此日詢雙星浮漢月五老下
空辰世際書銜鳳人占紱繫麟數盈當卜魏極峻
正生申大斗宜初酌朱輪會並臻宮牆下士陋圭
竇草衣貧經許升堦執才非入室倫源泉瞻宿海
象緯仰秋旻把土辭難罄歌風誘善循但期平格
壽耕鑿共堯民

病中口占示立齋弟

二首

累汝真憔悴經旬未解衣愁顏常似結緩帶不成

圍量水晨投藥移燈夜歛扉前人稱庾袞如此故
應稀

爾病復多日沈憂更百端據牀疑宿醉擁絮爲微
寒浮梗渾難定棲枝總未安

時方移寓

且拚扶杖起共觀

月團圓

述病示彭橫山給事

四首

禁門簪筆數群公寓直叨陪騎省中詎有沈憂成
躑躅不堪瘦影自氤氲御香鎮日春雲擷宮柳終
朝細雨濛濛得西鄰青瑣客劇憐愁病昔年同

銀海微波一路通黑圓無恙愧方瞳

時病目

懸珠準擬

東方朔巖電虛傳王濬冲乍見微雲來點綴俄驚
初暈已朦朧東華十丈紅塵起常在迷離倦眼中
昨宵秉燭檢殘編肱篋何人一惘然却笑卮言亡
敝帚祇餘故物是青氈秘書堪借愁多病著作無
成過壯年愛弟從容還告我減除思慮好安眠
驛路三千憶故鄉涓涓清淚滴衣裳角弓彷彿侵
杯影白馬依稀認練光向午支頤拋舊帙逢人感
額問良方禁林誦讀真無分祇合荷衣向草堂

柏鄉公致政

二首

黃閣功名照史編兩朝弼亮主恩專嘉謨已效

貞觀代擘畫仍高地節年濟世黑頭看補衮辭榮
華髮羨歸田 聖明丙夜方前席未許銜杯樂避
賢

金鑑丹宸夢不忘東山此去興偏長歸裝鄴架三
千卷生計成都八百桑龍腹曾蒙題姓字桃陰却
喜傍宮牆斗南極望情何限好爲蒼生檢藥囊

送張禮存編脩南還寄詢尊人湘曉先生
鐵甕城開壓潮汐長江混混連天碧上有黃鶴峻
嶒之高峰下有神仙留侯之第宅留侯家世玉爲
堂兄弟聯翩珠樹行一朝裘馬辭天闕詎爲尊鱸

憶故鄉

君恩特許羞甘旨秋水揚帆幾千里屈
指登堂拜慶時蟹紫花黃家醞美君家堂上老司
空海內人呼張長公玉珮池頭身是鳳冰壺洛下
嶽爲崧公才自合推公望御書姓氏丹宸上東
山暫許謝安閒洛下還須司馬相文采風流世莫
倫膝前都是佩魚人丹心共吐酬明主白髮爭先
奉老親君家父子有至理予舍朝堂總一視大男
省侍中男留君親之間差可矣走也詩因愛菓
題兩間瓦屋各東西浮名遠愧雞棲樹返哺空憐
烏夜啼送客南歸魂欲動況忝通家李與孔贈子

金莖露百壺綵衣歸向高堂捧花發驪駒不肯留
有人天際望歸舟秋風直上三山頂江月長懸萬
歲樓

題益詠堂爲宋長元先生

往者天啓歲丙寅宋公出宰清豐民清豐于古頓
丘地俗異鄒魯長斷斷大猾椎埋復剽劫探丸赤
白誰能馴公縛渠魁肆諸市夜犬不復聞狺狺比
閭井牧始安堵農桑水旱時撫循官代馬解紆民
屯催科不擾差徭均薦剡課績奏天子陟于朝署
優賢臣生爲立祠肅香火麗牲碑下虔明禋宋公

有子官再達停車瞻拜還逡巡父老見之嘆且泣
乞公畫像垂千春至今歲月亦已久桐鄉遺愛終
難泯公晉司勳亦典禮與贈太僕鑄貞珉炳耀大
節揚千億賢臣之後宜振振循良一德天所贊子
居朝右身爲神溪毛澗水足千載何須彩筆圖麒
麟

送曾青藜歸上母夫人壽

二首

洛中乍寫三都賦記室如何苦憶歸桂樹未須招
隱伴蘭陵只自戀庭闈堂前紗幔顏猶好殿上肩
輿事已非但使鳳毛聲價在千秋圖傳有光輝

侍郎勲業存鍾鼎無恙魚軒素髮新舊識士龍纔
入洛又看歸馬爲寧親青來彭澤天低浪白轉匡
廬瀑近人好向麻姑問桑海丹砂移駐北堂春

西苑

四首

丹禁晴開畫漏遲上林春水綠逶迤金堤柳弱龍
媒下玉殿花深雉尾移淑氣暗通三島月和風先
拂萬年枝宸遊扈蹕宜春院多是天街燈火時
綵橋珠箔壓芳塘玉露金莖接建章三素雲霞融
晚色九成臺殿護朝涼樓船乍泛荷風動闌檻平
臨行帶長最是昇平多暇日從臣無事奏長楊

馳道朝回散玉珂
簫韶初引翠華過
西山碧巘排
窻入北闕彤雲傍輦多
隱隱宮堤圍御幄
迢迢水殿接明河
臨風
睿藻飛揚甚不數
橫汾一曲歌

太液凝雲淡不高
水邊亭榭迢迢遙
蓬萊雪滿初移蹕
鵲鵲寒多散早朝
絳節爐煙紫別殿
玉河帆影凍平橋
東郊未轉迎春仗
已見鶯花徧九霄

哭殤子

三首

連朝頻伏枕掌上失珠圓
妖夢經時踐愁思鎮日牽
暄寒添病態哀樂到中年
強學東門達低徊輒

泣然

一燈殘土銼五夜響陰風掩淚嗟何及鍾情恨豈
窮茫茫將改歲冉冉已成翁不待西河泣雙眸在
霧中

華省同時客臨沂最有名

王阮亭亦喪子

傷心亦灑涕對景

總如醒殘月窺朝幌寒鴉噪晚城含悽向山簡我
輩豈忘情

寓齋小飲同潘孟升舍弟立齋

二首

曉靄金塘樹晴和柳市風不言千里客暫盡一樽
同豪飲輸吾弟狂吟數禿翁未妨聽玉漏宛宛月

當
中

此地宜清嘯到門屐齒稀窓臨春水濶樓眺夕煙
微坐久看燈炮談深換袷衣繁花殊未發早爲惜
芳菲

送座主孝感熊公省覲

孝感先生天人姿泰山巖阿長桂枝汪汪千頃標
襟期橫經身爲帝王師九重聖德今媯義時
時召對銅龍墀殿高語細人莫知下朝雙簾當戶
捲焚香暝坐到日晡學也立雪間披帷難字進問
楊亭隈輿篇隱帙了不疑竊喜馬鄭親規隨先生

正色還相詆謂此章句胡爾爲淵源當溯洛與伊
慎勿誤蹈荀卿疵小子再拜敢自隳擬策鳩鈍煩
箝鎚一朝北堂勞夢思拜表屢領天子頤建章
日影搖梁恩溫詔暫許還南陲鋒車刻日來休
遲敕賜天廡飛龍騎珠鞍金絡光陸離道旁觀
者爭歔歔更聞上林果纍纍赤瑛盤爲高堂遺緋
袍綵袖正相宜臣忠子孝兼得之古來盛事誰如
斯先生遭逢一何奇吁嗟乎先生遭逢一何奇白
華由庚龢笙詩

孫岷瞻招同吳長庚嚴就思蔡石公徐方

虎飲李將軍園亭

二首

宣武門西別業幽，羣公載酒共銷憂。
石迴鸚鵡依雕檻，泉噴珠璣入畫樓。
倚樹詩成欣暇日，看山人醉坐深秋。
六龍正向榆關度，留得陽和徧九州。

似秋初

連日天煖

擢瑜藉草坐行觴，孫楚高歌興欲狂。
祇訝官閒多好句，偏因歲晚惜年芳。
龍潭百尺澄寒影，梅圃千株逗早春。
帝里風光應戀賞，連朝莫厭馬蹄忙。

蔡石公招集天寧寺兼遊白雲觀

二首

籃輿攜伴愜幽懷，古寺寒鐘景色佳。
開閣青山方

滿坐入門紅葉已翻堦清談不厭王濛茗椀
同蘇晉齋會向射堂還秉燭知君不惜酒如淮

禪房

不設酒
故云

浮圖寶鐸半空聞仙觀還看傍白雲霜樹紺園鴉
自集巖花丹竈鶴依群碑鐫仁壽留千載蹕駐崆
峒記數君行樂祇應憑眺徧未妨徙倚到斜曛

宋蓼天先生招諸公集黑龍潭分得龍字
城南仙館問幽蹤陶穴人家路幾重古堞寒雲連
絕塞高壇深樹祀先農絳霄九奏看翔鶴碧甃千
年起蟄龍宴坐繩床無一事洞門餘靄落青松

再與諸公集龍潭同三舍弟作

祠宮檜柏儼成行躡屐還須到上方秋洗巒光明
絳闕霜吹木葉下銀塘壺樽偶設成佳節親舊相
逢即故鄉正擬題詩留石礪催人歸騎是斜陽

存菴招集玉皇閣得高字

崇臺臨廣陌別館俯平臯片水寒煙積千峰秋靄
高苑牆獵騎過津樹野鷗號落葉紫仙竈殘霞罨
客袍蒼然收塊莽靜若遠城壕旅鬢繁霜換流年
逝水滔得閒頻載酒乘興即揮毫公子江離佩佳
人金錯刀書鞭殊未已蠟屐不言勞莫忘城南飲

今朝意氣豪

贈歌者

柘枝舞罷憶家山
落日長楸走馬還
絲管春風急
相待莫因霜色損紅顏

桑乾歌送章含可左遷滎陽

桑乾之水接玉泉
飛橋百尺虹霓懸
公卿飲餞青門外
冠蓋紛馳古驛邊
獨有蕭然襆被者
落日南征欵段馬
都下曾懸呂覽書
青徐向立樂公社
一官不達數偏奇
八口飄零淚盈把
吾聞滎陽近成臯
鴻溝割據爭雄豪
靈源山帶金堤壯
廣武城臨

汴水高勸君更酌紅亭酒
離歌聽罷頻回首
桑乾車馬日夕多羨君
高名滿人口

隴山歌送許天玉之官安定

隴山高高隴水流
隴西六月如清秋
蕭關朝那近北地
酒泉張掖連涼州
諸葛戰爭餘故壘
隗躡官殿成荒丘
繡衣案部求名馬
都護行營耀錦裘
數聲羌笛落梅怨
一曲秦箏邊月愁
許侯分符萬里去
欲行不行日將暮
青門遙送隴山行
目極輪臺鳥飛處

次韻送李侍御召霖

二首

祖帳青門意渺茫
繡衣今日向蠻方
金臺北去書遠
銅柱南來道路長
吏議外遷中執法
君恩朝拜暮嚴裝
久諳仕路風塵裏
莫學離騷詠八荒
青旻榮路本微茫
白水交情又各方
顧我夢隨梁月滿
知君心逐嶺雲長
不妨驄馬春辭國
便有潮雞曉促裝
前席定知憐賈傅
肯容才子滯遐荒

龍光塔次王仲山原韻

層層朱綴護香臺
影落芙蓉四照開
震澤煙光吹不去
西神峰勢引還來
清秋羽翮盤高隼
中夜星辰宿上台
金碧忽驚從地湧
使君元是棟梁才

送錢葆馥舍人南還

青綺門前官柳疎，故人欲別意躊躇。
非關張翰思鱸膾，自是潘安戀板輿。
驛路煙波三月舫，清齋風雨一床書。
家山莫便成留滯，蚤晚承明待直廬。

送周雪客次韻

二首

愁君方歲宴，驅馬太行東。
幘脫飛觴際，詩成擊鉢中。
驛樓明凍雪，野戍吼嚴風。
莫忘張燈飲，羣賢此夕同。

高齋時擁剎，秋水在軒前。
門有嵇康駕，囊無趙壹錢。
庭幃方覲省，祖帳暫流連。
春半秦淮漲，還期發

畫船

座主宗伯龔先生招同司農石先生王襄
璞陳階六嚴就思孫祀瞻徐方虎飲黑

龍潭限韻

四首

並馬尋幽勝蹄翻雪後沙農壇依輦路藥圃欸仙
家冰泮靈池水春催別館花欣陪遊賞徧遲日未
西斜

連旬多雨霰今日是花朝駘蕩風初好微茫雪欲
消岡巒環鄣塞宮闕入雲霄極望皇居壯偏令
逸興饒

佳會知難遇花朝況及辰寒醅香乍發時鳥轉方
新城角雲如幕庭隅月趁人元龍豪氣在躡履謝

平津

謂襄
璩

終宴寧辭倦當軒玉宇清烏啼還听憤燭跋尚飛
觥蕭散通人慮婆娑久客情刺蘼千樹發後會及
春晴

宋荔裳王西樵阮亭嚴修人米紫來汪蛟
門喬石林集寓齋分韻

二首

花飛當晝靜鶯語恰春殘藉有群賢至聊尋永日
歡看山常卷幔待月一憑欄莫惜留餘興與京華此

會難

最是張燈飲掀髯興倍饒
土風諏列國軼事說前朝
隱隱銀鈞沒遲遲玉漏遙
停杯清嘯發意氣迴雲霄

送周絨齋

才子聲名重石渠
暫辭北闕意何如
性耽猿鶴常移疾
家繞芙蓉好著書
問我行藏憐鍛羽
把君詩卷惜離居
片帆會過梁溪水
霜葉千林照筍輿

送程周量出守桂林

五首

芙蓉細雨玉河清
有客臨流正濯纓
萬里一麾看

剖竹羣公三伏送行旌籌兵久軫巖廊晝視艸還
高省闥名知是聖朝南顧切勞君匹馬勸春耕

省元文采重金門廿載升沈莫具論掩扇脩蛾辭

殿闕乘春海燕別華軒侍中誄筆傳三館

周量作
端敬皇后

誄爲孝
陵所嘉賞

駕部詩名動九闔

沈侍講常奏
程某詩最工

奪我鳳池休

嘆息由來領郡羨朱幡

瘴癘初銷五嶺春梅花處處引征輪官臨象郡初

持節家在珠江若比鄰愛子數齡看長大藏書萬

卷足清貧戢山

周量
堂名

無恙烏皮几攜向衙齋對故人

越嶂連城

秦離

江日夕水聲聞碑鐫元祐憐

鈞黨

桂林有元祐碑

地擁戈船舊駐軍卧閣祇須供嘯咏

門應已息紛紜政成好比顏光祿直削山王詠五君

京國論文一紀周慣嘲熱客最風流覓君且過波羅廟呼我同登文選樓常對綺琴逢黝黑未嫌越語類鈞輶桑乾桂郡千餘里別酒盈觴不盡愁

送吳孟舉

紅塵十丈暗金堤送客離筵班馬嘶北地幾時逢柳色青山歸路有鶯啼詩吟驛館傳新句席捲春江向舊溪此去故人多錄別涿尊何處重相攜

送王異公

才名仲祖世應稀
匹馬東風出帝畿
別弟高吟傳瑣閣
思家清夢繞庭幃
春光雪後添新霽
寒食花前換袷衣
宣武門西一尊酒
不勝惆悵送君歸

題異公詩卷

四首

雪積春墀似掌平
擁爐兀坐到深更
把君詩卷挑燈讀
一夜風吹玉宇清

風格居然大曆年
思深略似李東川
自然清麗饒佳致
不用尋摹漢魏前

短髮毵毵太瘦生
禿衿小帽跨驢行
蘭亭一老方

脩禊愛子歸來五字成

曾陪祭酒共論詩
堆數君才是白眉
若到梅村還問評
藥欄茶竈有餘悲

七夕蕤音招飲未赴走筆代柬兼示顧放亭

金溝柳色帝城秋
昨夜銀河會女牛
蟋蟀乍鳴風葉下
葡萄初熟露珠流
吟詩工數何平叔
愛畫癡惟顧虎頭
多病輸君良宴會
懷人只在曝書樓

赴京兆宴入棘闈口占示蔡石公同年

聖世巍科錄異才
詞臣聯騎瑣闥來
春曹捧敕

羣官侍御路簪花京尹催九陌和風搖玉珮滿堂
晴月瀉金壘三年兩度叨恩宴
庚戌臘唱日
燕京兆府鳳闕紅
雲首重廻

絕句

四首

三載前猶席帽生謬持玉尺忝司衡莫嫌燒盡三
條燭曾聽高樓畫角聲

同時名姓徹楓宸羨爾螭頭作近臣
謂石公今日承恩
來棘院不才還喜附清塵

沙街走馬整珠鞭騎省風流並少年最憶長楊陪
戟者將隨行幄待溫泉
憶此瞻
諸同年

亭午傳籌禁鑰開大官供膳繡衣催中宵不用銅
盤蠟應有珊瑚照夜來

入闈示分較諸君

敞閣深沈警柝聞如鉤新月澹秋雲金壺三點清
宵靜樺燭千行鎖院分鸞掖乍辭攜秃管綺筵初
歇帶微醺諸公衮衮皆時彥共把文章報聖君
撤棘後贈葉元禮

之子南方秀本是凌雲姿清光滿滄海濯濯珊瑚
枝年華艷朝日藻影臨清池風吹上金臺來奏刻
羽詞豈惟傾側時人耳使我識曲情爲移天馬驟

三言
驪正驤首雪花散彩精權奇秣燕刷越超滅沒齧
膝不敢加金羈道逢良樂休嘆息明日追風空萬
匹人間遇合會有時暫放龍文豈終失君不見館
娃越女顏如花六宮嬾粉徒咨嗟只言富貴當如
此誰信春江自浣紗

子房歌贈陳廣陵

子房五世相門子顏色綽約如佳人博浪沙中過
萬騎奮椎一擊圖報秦可惜副車還誤中日光黯
黯飛黃塵人事推遷復韜晦神龍泥滓蟄不伸圯
上老翁原異物滄海力士脫有神孺子殷勤跪納

履短衣濩落淮泗濱他日風雲邁時會鴻塞鳳
孰比倫丈夫遭逢詎有定貴賤反覆難具論酌酒
送君歌此曲寒風颯颯隨車輪

昭君詞送朱人遠

秭歸佳人好顏色睂画脩蛾鬢蟬翼長門晝靜永
巷閒禁樹深沈鳴促織漢宮多少紅顏人那得春
風都省識梧桐葉墜碧瓦霜條遣嬋娟向絕域吁
嗟乎朔雁寒風萬里悲簞簞邊音馬上吹由來薄
命都相似莫漫含愁怨畫師

再送元禮二絕句

亂雪飛飛青綺門如君漂泊復何論臨岐慚愧真
無語淚灑征鞍欲斷魂

兔苑繁臺我舊遊睢河如帶夾城流懸知地主開
軒待孝伯還披鶴氅裘

葉赴睢州王公垂之約

題陳階六小照

當年諫草避人焚賜沐公餘樂事紛圖裏列眉多
偃月賦中留枕盡行雲賓朋北海尋常見絲竹東
山髣髴聞只恐飛樓空百尺未容高卧便輸君

伯母昌太夫人壽詩兼示兄敬菴吏部

壽母垂僖頌共姜錄衛風節高成子孝心苦誘天

衷黃鵠晨霜寡青陵夜月空千山迷白骨兩世屬
孤童虎尾災親履春臺煖乍融收嶠魂竟反葬雒
夢還同後漢溫序事雛鳳當霄起神鵬絕漢舛淒其攀淚
柏辛苦念九熊甲子新週歲艱危百鍊躬聞幽存
特筆獻祝託歌工大節光圖史精誠叶上穹何人
彈絕調冰雪在梧桐

座主合肥先生壽詩三十韻

手筆唐燕國風流晉謝公九重須篤弼五禮繫宗
工世係升沈數人知啓沃功名懸三島北身障百
川東磊落紆深眷綢繆効匪躬千秋歸運會一德

動昭融寒燠經宸慮風霜入睿衷臨軒學士

遣宣敕御醫同

上命學士傳達禮醫官茹文珍視疾

宛曲隨三澣委蛇

信五總侵睂陽氣上拜手主恩隆聽履螭頭表叅
輿豹尾中高標披宿霧爽氣薄寒空立幟尊儒域
扶輪繼國風縹緗開虎觀琬琰照龍宮壁有王筠
賦杯無樂廣弓揮毫神獨王置驛興仍雄汲引寧
遺力聲華每發蒙涓流同注壑弱翻早依藁感激
緣明義追隨負小忠顧深轅下駿恩甚疊餘桐玉
笋名重忝金閨籍濫通深知期刻鵠曲意獎雕蟲
壇坫收毛遂絃歌引戴崇秉心酬欸欸矢報愧夢

夢衣被忘寒暑吹噓到始終春隨灰律轉月入玳
筵紅數甲應同絳生申憶降崧文星環斗極劍氣
倚崆峒皓首非商老丹闕萬洪功成餘壯節長
此荷幘幘

有贈

四首

城西輦路起芳埃院落深陰獨興杯曉霽春光催
過半天邊冉冉玉人來

客歲聞鐘月正圓禿衿小帽向離筵無端逐雁南
飛去閒都銀箏已隔年

游冶春風短簿祠張燈高唱合歡辭生來紅豆相

思種染作羅裙濕時

繁花如雪徧旗亭花下相逢醉醪醕一曲清歌雲不散都人依舊識秦青

寄贈張螺浮都諫

直聲久已徹楓宸兩入梧垣領薦紳廿載封章真諫議九齡風度本詞人共推大節高雙闕自有嘉猷庇萬民早遣追鋒還左掖待公清切掌絲綸
鑿于休假玩湖山春酒千觴駐渥丹弟妹不妨閒
賭野羊何應許共登壇檜堪作楫皆遙望松欲爲
霖盡仰看四海蒼生方倚待幾時重著鷄鷄冠

贈錢宮聲

二首

明光賦草萬人傳，入洛初看終賈年。
材比豫章須作柱，詞高清瑟未張絃。
行藏暫託漁樵侶，品藻長居俊及前。
欲遣雄心還運甓，何勞鍊骨更求仙。
與君束髮爲昆弟，荏苒流年見二毛。
自笑子雲隨陛楯，多慚仲蔚伏蓬蒿。
群公薦牘推名姓，使者徵車建羽旄。
五十遭逢身未晚，晚殺竿先與掣連鰲。

送喬石林中翰

廣陵秋色正蒼茫，望裏濤聲接故鄉。
賜沐新乘青雀舫，能詩舊識紫微郎。
歌來桂樹當筵發，行處芙蓉

卷繞岬香翻憶去年同瑣院
熒熒華燭漏聲長

再送石林南還

秋霖十日餘綺陌涼颼動曲沼荒芙蕖踈雲連蟬
蟪彼美駕南軒傾城涉陽送餞別感蕭晨驪歌悵
賓從嗟予苦無悰悵然睇飛鞚君本珪璋姿挺拔
堪世用筮仕登禁林阿閣巢鸞鳳昨歲入鎖闥局
鑰連旬共展卷恣討論含毫互吟諷樺燭到更深
連宵廢清夢敢云羅梗梓庶幾謝愚瞢嫵節非徇
名秉心實違衆薄青言路議深文吏議中予旣辭
玉堂君復奪清俸嶮巖行輒妨弓矰倦羽恐君念

白髮親咨嗟歎尸饔逝將歸射陂進止權所重聞
歌杜牧狂邀笛桓伊弄但知子舍歡何論官階壅
緬惟東晉詩白華足吟誦小人亦有母服勞行抱
甕吳淞杳靄溪林屋煙霞洞終辭世網牽詎作窮
途慟

御試大閱七言排律十二韻

菴藹韶光上苑開祥雲宛宛六龍來西山朝爽明
殘雪御路春和綻早梅駐蹕條風吹別館晾鷹旭
日照高臺朱旗橫矗青霄上翠輦徐穿碧澗隈萬
騎羽林森虎豹千官帳殿列鄒枚指麾乍見旌霓

合駢驟初聽畫角催旋挽雕弓驚雁陣還調玉轡
引龍媒平沙暮捲塵如霧七萃雲屯響似雷五柝
賦成傳彩筆鈞天樂奏進金罍芳春三古蒐田禮
湛露千年宴鎬杯綽約羽旄霜仗動歲蕤曲蓋玉
鑾回小臣慚愧徒操簡何幸遭逢得預陪

喜仲弟彥和及第同三弟作

羣官侍立待臚傳仲氏還聽黃榜宣有弟蒙恩踰
一紀慚余擢第已三年簪裳舞蹈聞仙樂鼓蓋喧
繁入御筵所幸家門多忝竊酬知何惜薄軀捐

贈魏環溪侍御

魏侯抱至性道要集厥躬微言繼絕學森然不顧
風卓哉蔚州譽籍籍驅章逢歸流赴大海信是百
谷宗世道日去古斯人若鴻蒙君相憂人心詔起
丘園中昔批夕郎敕今騎御史驄丈夫得君時動
笏排丹楓發攄濟時策曩烈繼鄭公矢之自懸弧
祝爾羞雷同

贈陳脢倩

小儒不足爲賢達古所稀我交天下士獨數先生
奇詩書見根柢涯涘安能知浩蕩極詞源江河注
于茲卓哉忠孝門富貴棄若遺澹澹金牛河何能

潛珠輝才名三十年結客皆俊者百爾歸折衷言
必中時宜蟬冕或盈廷何如大布衣夙昔仰止間
屹然山嶽姿頗沾薊門雪虬鬚已如絲一身備文
獻何當達所爲漢廷求五更桓榮非異時

送杜子靜編脩

中禁詞臣憶故鄉滹沱春色曉蒼蒼家連赤縣朝
天近路轉紅亭引興長御柳吹絲隨馬勒宮花裁
勝上釵梁恩沾休沐逢人日不用題詩寄艸堂

送陸恂若隨梁大司農之廣州

尚書旌節粵南行後乘翩翩有陸生去日青門方

設餞到時炎海定收兵
藥囊檢點銷蠻瘴詩卷封
題對旅檠會見從容車馬客
交驩平勃重公卿

退谷孫先生招同王敷五陸翼王小飲因

出李文正吳文定諸公賞菊聯詩手卷
隨命各賦絕句追和昔人騎字韻

三首

竹窗簾捲對烏皮
插架圖書雜鼎彝
艸就玄文從
客問養成白鶴教人騎

高臺日落動涼颼
寥亮俄聞鐵笛吹
便欲凌風生

羽翼六鰲直共列仙騎

是日登高臺

惜別紅燈照酒卮

余與數五皆將去

消談玉屑最堪思
他年

重過微遺事街鼓鼕鼕欵段騎

用西涯諸公韻呈退谷先生

蕭齋白髮散輕颺廿載朝簪掉首辭黃菊籬邊還
獨采青牛關外不須騎名山著作傳昭代館閣風
流記舊時玉軸摩挲頻太息酒闌燈炮索題詩

贈侍御魏環溪先生

魏公宿望表君宗清節嶙峋萬仞峰經世才歸青
簡業回天力在皂囊封俗還虞夏功無讓樂在詩
書德愈恭帝里只今饒氣象不教三市鬪歌鐘
環溪先生招飲餞別次韻奉謝

星河晴轉露珠垂。昔酒杯行惜別遲。鄉思遠，
雁下官情長似土牛騎。白華元足勞勞夢，菊醪更
囊去。去時惟有先生懷古處。殷勤贈策記將離。

用西涯諸公韻送顧見山赴洮岷

二首

燕山落葉捲寒颼。共向津亭餞玉卮。紫塞曲隨關
輔轉，青驄驕稱使君騎。山城片月明樓夜，驛路寒
光被坂時。獨羨野王開憲府，風流三絕畫兼詩。

蕭颿邊沙攪夕颼。涼州樂府唱新辭。能言鸚鵡行
軒聽，異種駙駘案部騎。隴阪錦裘深雪裏，蘭山笳
吹曉霜時。洮岷舊接西川路，乘興還尋杜甫詩。

贈別沈繹堂先生再疊前韻

二首

玉堂蘭菊漾輕颺學士花磚艷雪辭當代爲龍門
罕到帝京有鳳醉能騎賜貂長樂承恩日給燭
明光草詔時最是休文懷彩筆蠻箋小疊寄新詩
秋深落葉滿寒颺握手先陳欲別辭燕嶺最憐鴻
已度揚州誰道鶴堪騎銀簫午夜朝回後玉樹千
山客醉時何日花前再相見茱萸細把共吟詩

殿聞偕諸公餞飲李將軍園三疊前韻

二首

名園高譙起涼颺鑿落斟來醉不辭花發綺園鸛
鶴舞月明廣陌驕驕騎蕭晨倦客將歸際勝餞群

公下直時記得前朝存軼事官街然燭夜聯詩
白袷單衫急暮颺承明從此拂衣辭璩璫客訝仙
禽舞蜚蛸人憐病馬騎青綺門憐埽里日紅綾餅
憶拜恩時深慚鳳沼多仙侶滿袖琅玕送別詩

即事別舍弟四疊前韻

四首

愛弟晨衝楊柳颺牽衣惘惘不能辭籌時急作亡
羊補涉世休將猛虎騎南國人宗王仲寶東朝國
是鄭當時自然堅白無緇磷記取前賢勵志詩
碧天涼月動寒颺旅舍孤檠讀楚辭壁上畫龍常
作兩門前銅馬不堪騎愚如杞國多憂日醉似中

山未醒時聞道柏梁傳雅唱舍人佶曲亦吟詩

梧桐墜葉下微颺樂譜淒清長信辭齊國舊看瘤
女貴庾公偏愛的盧騎鸚鵡巢繡戶原無主花信文
茵會有時皎潔可憐霜雪似閒吟紈扇婕妤詩
震澤波光漾夕颺白蓑漁父誦清辭橘中儘合攜
枰住塞上寧悲失馬騎但假兵厨堪任達縱饒狗
監豈逢時湖邊舴艋經行慣且覓王維畫裏詩

韓元少王季友二子送至柳巷口占賦贈

五疊前韻

柳市涼吹送客颺高吟二妙有新辭蒼龍曉闕聯

裾入朱雀長街並馬騎努力文章堪報國關情師
友更憂時機雲山下餘茅屋驛信南來數寄詩

嚴蓀友姜西溟策蹇相送時各赴館幕六

疊前韻

綈袍秋晚入寒颼古寺松陰執手辭襍被但餘匳
僕伴送行頻借蹇驢騎蕭騷嚴叟披裘意辛苦姜
肱擁被時那有樊籠留鳳鳥低徊應諷五噫詩

留別高阮懷七疊前韻

涼秋九月動輕颼別爾何能置一辭才子雕龍徒
自好仙人赤鯉幾曾騎霜天鉦鼓愁開塞山館煙

蘿換歲時異日故交憐太瘦謂愚莫嘲飯顆苦吟詩

值合肥座主家童有感

二首

淒清薤露不堪聞已抱銀箏別主君門客便看珠履散三天哀雁叫寒雲

華屋瓊瑜設讌時藏鈎記得酒行遲逢卿便作西州慟不用悲吟子建詩

憺園文集卷第五